

Necessitad u putgà politic cun politura d'aur?

Tschintg parlamentarisch grischuns s'expriman tar la debatta actuala

DA CLAUDIA CADRUVI / ANR

■ **Exact sin lingia da lur partida èn ils tschintg politichers grischuns en il cussegl naziunal puncto deal da taglia e d'AVS. Ier durant la debatta davart il project fiscal 17 han els tradi a l'anr lur avis.** «I dovra ina soluziun per las holdings che profiteschan da preschent da privilegis fiscals», punctuescha *Silva Semadeni* (ps). La Svizra saja sut enorm squitsch internaziunal pervi da quests privilegis. Damai che las interpresas profiteschian dal project fiscal 17 saja quai necessari ch'i dettia ina cumpensaziun sociala. «Jau sun perquai cuntenta ch'il pachet preveda ina finanziaziun da duas milliardas per l'AVS.»

Ils socialdemocrats hajan gudagnà l'onn passà il cumbat cunter la refurma fiscal per interpresas III. Uss hajan ins chattà ina meglra soluziun, di Semadeni. Ella fa dentant er attent che sia partida n'ha betg cuntanschì tut las finamiras e na saja betg d'accord tar tuts puncts – per exempel areguard taglia sin dividendas ed areguard la concorrenza fiscal tranter ils chantuns.

Brand: «In putgà politic»

Ier ha il cussegl naziunal confermà il deal da cumbinar la refurma da taglia d'interpresas cun ina finanziaziun d'AVS. La pbd avess preferì da separar las duas chaussas. «Sche nus rabagliain atras

gronds pachets mo pli sche nus dain zutgerins da duas milliardas, lura faschainsa fauss insatge», di *Duri Campbell* (pbd). «Jau na poss betg enclerger che nus parlamentarisch na pudain betg pli porscher bunas soluziuns.» Il politicher ladin conceda che las duas refurmas sajan necessarias, ma el fa attent ch'il stadi stoppia parjar radund 800 milliuns per l'AVS e ch'il rest vegnia rembursà dad affars e dals la-

vurers che ston laschar trair giu dapli da la paja. *Magdalena Martullo* (pps) è s'exprimida ier avant il cussegl naziunal cun verva cunter il pachet dubel «cun politura dad aur». I sa tractia d'in tric per metter empatg ils votants che na sappian betg co votar sch'els sajan per la refurma d'AVS, ma encunter la refurma da taglia u il cuntrari. Cun il pachet preschentà tirian ins mo ils daners ord giaglioffa a la

glied. Ins stoppia separar las duas chaussas e far ina buna refurma da taglia ed ina sanaziun durabla da l'AVS. En in'intervista l'entschatta da la stad aveva Martullo anc ditg ch'ella possia viver cun il pachet (LQ dals 15 da zercladur).

Heinz Brand (pps) dat en la medema crenna. Tenor el n'èsi gnanca cumprovà che las consequenzas fissan uschè grevas sche la refurma da taglia s'entardass. La

cumbinaziun da las duas refurmas saja in «putgà politic» e giaja encunter il principi da l'unitad da la materia. Quai na sa laschia betg giustifitgar cun la stabilitad giuridica. Ins fetschia valair ch'interpresas internaziunalas bandunian la Svizra pervi da la mancanza da la stabilitad giuridica. Ma gist l'exempel da Novartis che stgaffeschia uss puspè plazzas en Svizra en la medischina d'egls mussia che la malsegurezza giuridica na possia betg esser uschè nauscha. «Las interpresas crain vi dal plazzal svizzer», è Brand persvadi.

Candinas: «Daners per l'AVS n'èn betg pers»

Ins possia schon sa dumandar sche l'unitad da la materia saja dada, conceda *Martin Candinas* (pcd). La dumonda centrala saja dentant co ch'ins vegnia tar in project che blers profiteschian e sustegnian uschia ch'ins cuntanschia ina maiortad. «Nus essan sut squitsch da l'EU e nossas interpresas han in interess eminent che la Svizra na sa tschientia betg sin la glista naira da taglia», di il politicher sursilvan. Plinavant na sajan ils daners ch'ins impundia per l'AVS betg pers, mabain investids en la tgira e prevenziun da vegliadetgna che dovria gea tuttina ina refurma. Il parlament ha en senn da deliberar anc durant questa sessiun il pachet da taglia e d'AVS. Il glindesdi tracta il cussegl dals chantuns per la segunda giada la fatschenta.



Las interpresas indigenas profiteschan da taglias pli bassas cun il project fiscal 17. Persuenter s'augmentan las deducziuns per l'AVS level.

KEYSTONE